

KONTROL MOZIOA

Larratxo auzoak pairatzen duen mantentze falta dela eta

EH Bildu udal taldeko zinegotzi Zigor Etxeburua Urbizuk mozio hau aurkezten du Udalbatzaren Organo Araudiko 98. artikulua oinarri hartuta, Udalbatzan azter dadin. Mozioaren oinarria 2021eko otsailaren 15ean Zerbitzu Orokorren Batzordean aztertutako interpelazioan dago.

JUSTIFIKAZIOA

Iazko iraileko udal batzordean, Larratxo auzoko bizilagunek Udal Info zerbitzuan jarritako kexak aztergai izan genituen. Herritarrek eskatu zuten kaleak garbitzeko eta zaintza indartzeko; behar izanez gero, zigortzeko beren txakurren gorotzak biltzen ez dituzten animalia jabeak. Garbiketa zerbitzuarekin ere ez ziren pozik ageri, aipatzen baitzuten ez duela garbi uzten zorua. Hain zuzen ere, auzoko dendariak kartelak jarri zituzten horien ingurukoak salatzeko.

Orduko hartan, zinegotziak erantzun zuen, Larratxoko zoruen garbiketarako, beharren arabera zerbitzu bat dutela, eta berak horrela eskatuta, abenduan garbiketako taldea bidali zutela, zoruak zikin zeudela ohartu zirelako. Era berean, Askatasunaren Etorbideak eta Larratxo auzoak garbiketa ezberdina dutela esan zuen, baina argazkiak erakutsi zitzaizkion, ordu berean egindakoak, ziurtatzeko bi kaleetan garbiketa hein berekoa eta bikaina dela. Zinegotziaren hitzetan, udaltzainak ere pasatzen omen dira Larratxon zehar, eta isunak jartzen omen dizkiete txakurrak askatuta eramaten dituzten pertsoneri, baita zakurren gorotzak biltzen ez dituztenei ere. Irtenbide bat topatzeko, zergatik ez duen auzotarrekin lan bilera bat antolatu galdetuta, ordea, ez zuen erantzun.

Batzordean gai horiek aztertu zirenetik bost hilabete igarota, ordea, berriz ere jaso ditugu Larratxoko auzotarren kexuak. Oraingoan, kaleak zakur gorotzez eta pixez beteta egoteaz gain, zabor ontziak hondatuta eta zoruak irristakor daudelako kexu azaldu dira; era berean, arratoi ugari dabilzala azaldu dute. Horiek horrela, sinadurak biltzeari ekin diote, egoera jasanezina delakoan. Horregatik, otsaileko batzordean, EH Bilduk zinegotzi ordezkariari galdetu zion Larratxoko auzotarren eskariei kasurik ez egin izanari buruz, eta Donostia erdiko beste gune batzuetan egiten den garbiketarekiko aldearengatik. Zinegotzi ordezkariak ukatu egin zuen Larratxoko garbiketa aliritzira egiten denik, baina ez zuen ezeztatu garbiketa eskaripean egiten denik, iraileko batzordean bere kideak adierazi bezala. Bestalde, zakurren zikinkeria zakur jabe batzuen jokabide ez giza bidezkoen ondorio dela adierazi zuen, eta Txirrita kaleko atari batera mugatu zuen; gehitu zuen jadanik egon direla bertako merkatari batekin gaiaz galdetzeko. EH Bilduko kideok zuzenean ikusi dugu orokorra dela Larratxo auzoak pairatzen duen mantentze falta, eta hori bera berretsi digute auzotarrek.

Iazko irailean ere azpimarratu genuen egoera hau aspaldikoa dela eta Udal Gobernuak entzun egin behar diela herritarrei, erantzun egokia emateko beren eskakizunei.

Horregatik guztiarengatik, behean sinatzen duen zinegotziak honako KONTROL MOZIO hau egiten du:

EH Bildu talde politikoa

Grupo político EH Bildu

Ijentea, 1 - 20003 Donostia
Tel. 943481027 eh_bildu@donostia.eus-- www.donostia.ehbildu.eus -

MOZIOA

1. Donostiako Udalbatzak hertsatuki eskatzen dio Udal Gobernuari indartu ditzala Larratxo auzoan garbiketa eta mantenu lanak, eta auzotarrek ezagutu eta zaindu ahalko duten maiztasun finko batez egin ditzala.
2. Donostiako Udalbatzak hertsatuki eskatzen dio Udal Gobernuari indartu ditzala Udaltzaingoaren zaintza lanak Larratxon, animaliak babestu eta edukitzeko Donostiako udal ordenantzaren 23. artikulua agintzen duena bete dadila bermatzeko.
3. Donostiako Udalbatzak hertsatuki eskatzen dio Udal Gobernuari antola dezala bilera bat auzotarrekin, arazo berri jakin eta irtenbideak elkarrekin adosteko.

Donostian, 2021eko otsailaren 19an

Zigor Etxeburua Urbizu
EH Bildu udal taldeko zinegotzia